

ХАНТЫ ЯСАҢ



Основана
1 ноября 1957 года

23.11.2023
№22 (3634)

Аңки ёмәңхәтл пида!



Ханты не Фая Ефимовна Мултанова пухл пида Русскинская вошн. Н. Рагимова верум хур

Хутыса округевн
мир ямәлды
вер тәды

» 3

Вәдупсәл хұват
шуши мир
суртәт тўңматл

» 6

Ёмвошн
«ЮграТур 2023»
ванлтупсы вәс

» 8-9

Округ кәщә нә мир ещәлт путәртты питл

Ас потты тыләщ 30-мит хәтлән Югра мўев кәщә нә Наталья Комарова мир ещәлт, округ дума депутатәт па оса верәт тәты ёх ещәлт ясаң тәты питл. Лўв путәртәл, хутыса 2023-мит ол мәнәс, муйсәр ям верәт щи олн вәсәт, муйсәр верәт әхтыйн кәщә ёхлўв елды питты 2024-мит олн кәпәртты питләт.

Щи хәтлән округ кәщә нә лупл, муйсәр нәмн 2024-мит ол мәды. Щи нәм Югра мўевн вәлты ёх пириләт. Наталья Комарова лупл, муй иты тәм 2023-мит олн Югра мўев вошәтн па кәртәтн

вәлды мир вәсәт, муйсәр верәтн нух питсәт, муйсәр верәт әхтыйн елды 2024-мит олн рәпитты питләт.

Мосл лупты, тәнял ол ишимәщ мирхотн Н. Комарова лупәс, хуты 2023-мит ол округ мир кўтәлн



Н.В. Комарова. admhmao.ru сайт эвәлт вўюм хур

нәтәсты ода алыщәсы. Ищиты лўв щәта путәртәс, хутыса елды рәпитты питләт, дәлн округ мир

верәт яма ат мәнсәт.

Хәнты ясаңа тулмащтәс:
Надежда Рагимова

Россия мўев таксар ёх



Хурн А. Бузин

Тәм ванән Югра мўевн Росгвардия айкеләт әкәттәтәтәти хуятәт «Россия мўев таксар ёх!» верн ясаң тәсәт, муй пәта Советской вошн и вош хўлы младший сержант Александр Бузин нәмн пунса. Лўв мет оләң мўң мўевн «Золотая звезда» нәмп вулаң мевл посн мойләсы.

Кәщә ёх па лўв пиләда рәпитты хуятәт әкәтәщсәт па Валентина Валентиновна Бузина әңкел ими, рәт ёхдал, вәйтты ёхдал, пилә вәйтәнтсәт, дыв ләмәттәти сұхләд па лўв хәншум пищмайлад вәнтсәт па Картопья тәхийн лўв нәмәлн пунум вош хўлыя яңхсәт.

» Александр Бузин –

шеңк ям пух, пәлтапды па похатур хуят – мўң мўева мосты хәннәхә, интәм енумты айлат па елды вәлды нявремәта мосты хуят, – лупәс полиция хон ики, полковник Евгений Симаков.

Александр Бузин вәщ тыләщ 28-мит хәтлән 1976-мит олн Нижний Тагил вошн сема питәс.



Рәт мўвн кев хурасл верса

Кәтхушьяң, тәда питумн лўв әңкел па ашел пилә мўң округева Советской воша касәлсәт. Тәта лўв енмәс, әшколая яңхәс па елды вәнтдыләс, армия тәлта мәнәс. Армияйн лўв инструктора-кинолога вәс, ийха ампәл пилә кәт пуш Северный Кавказ мўва даласты китыйлса.

1996-мит тәлн Ас нопәттәти тыләщн, оләң мәнум рәпәхн, роман шәңқап атум ёх етмәсәт, па пушканән ещәлт есәлты питсәт. Щи даласты пурайн Александр Бузин щи кәмп пушканнәлнхәтпўшхойса, хәлүм пўш лавәрта хойса па дыләл вўса. Ампәл ям

ләхса тәйсәлә, нәмл Джон вәс, ищи кәщәйл юпийн дыләл сұхнәс.

Лўв вәлупсәл унтасн тәм хәтл вўш вәнты лўв пиләда далажум хәннәхуятәт тәлаңа па яма вәлдәт.

Рәт мўвл вәщкәта дывәлмәл пәта айлат рўщ хә Александр Сергеевич Бузин әнтәма ювмәл юпийн вән кәщәитн Российской Федерация Герой нәмп мевл посн юкәнтсы. Худт пәда лодюмты елпийн хўв пәнт хәйс, хўва мәнәс.

Росгвардия нәпек хәнты ясаңа тулмащтәс:
Светлана Сатина




Хутыса Югра муевн мир ямалты вер тэды

Там ванан округ мир ямалты вер тэты департамент кэща хэ Алексей Добровольский пида онлайн хуват вэйтантупсы вэс. Лув айкел тэс, хутыса округев луваттын там олн мир ямалты вер лэщатсы. Ши тумпийн кашаң ханнехэ веритас сыр-сыр нушайт олаңан иньщасты.

Шиты кэща хэев лупас, там ол Россия мув луваттын Югра мув пушие сема питты верн нивадмит тэхия питл, ханнехэ сурма йиты верн ветмит тэхийн. Яң тылащ мар Югра мувн 15411 шураc тэпие сема питас. Лыв эвалтэда 7891 – пухие па 7520 – эвие, 148 – нэмасңан пушие па 5 – имухты хэлум январемие питас.

Округевн вера лаварт меш тайты ех па́та немасыя нетупсэт тэса лэщатман вэлдэт. Там олн округ лекцитты па ямалты пельницан нял пүш сэм омассы. Шит вера лаварт па мосты вер.

2015-мит ол вүш эвалт Югра мувн мешаң хуята елды вэлты щира 129 пүш мосты уг омассы. Шит 62 – верак, 11 – мухал, 4 – сям, 40 – велум па 12 сем кев.



2023-мит олн: 8 – верак, 3 – мухал, 1 – сям.

Щалта мешаң ех тухлаң хопн тэтыды тэхия өрнтам олн 1538 арат пүш мешаң мира нетсы.

Елды кэщав айкел верас, муй щирн лүң пурайн «Николай Пирогов» немпи лекцитты хоп рэпитас. Леккар хопн юхан лепн вэлты 48 ай кэртата па ай вошата иса яңхсат. Кондинской, Нуви саңхум,

Сүматвош, Сэрханл, Манстяр, Ёмвош районан мир нух вантсат. Ийха лүңатты ки, хэт шураc кем ханнехэ ямалты йлды юхтылдас. Ши күтн 1389 шуши мирлүв. Кашаң хуят тата тэса нух вантсы па кәшилал-мешлаң арталдасыйт. Ям арат ханнехэ па елды немасыя лекцитты щира вэн вошата китсыйт.

2023-мит олн нивал йилуп лекцитты па ямалты тэхия пүншы. Шит:

◆ Сэрханл мув Русская кэрт хуца йилуп вэн па лашкам пельница. Тата имухты хатл мар 46 ханнехэ ямалты веритды;

◆ Конда мув хуца Мулымья кэртан йилуп пельница. Тата хатл мар сот хуят лекцитты щир тайл;

◆ Конда мув хуца Болчары кэртан ищиты йилуп пельница пүншы. Тата 26 ханнехэ ямалты па нял хуят нурумн улты веритал;

◆ Конда мув хуца Леуши кэртан 24 ханнехэ па́та пельница омассы;

◆ Сүматвош район Лэв кэртан имухты хатл мар 24 ханнехэ юхатты веритал па нял мешаң хуят па́та нял улты тэхия вэл;

◆ Манстяр районан Ай Аңклум кэртан ищиты 24 хуят па́та йилуп лекцитты тэхия пүншы;

◆ Ёмвош район Кирпичной па Согом кэртан мир ищиты йилуп пельница яңхты питсат.

Мосл лупты, хути Ёмвош район Реполово, Цингалы па Локосово кэртан ол сухумты елпийн йилуп пельница пүншы. Сүматвошн па район пельница тэса йилпатлы.

Там ол «Скорая помощь» немпи 36 йилуп машина лэтсы, ши тумпи хэлум уг ол сухумты ванта лэтла.

Мет ар иньщасупсы госуслуги хуца арсыр тохтура ханшаньщты вер олаңан вэс. Вантэ, там ол мар щит хуват нюр леккар хуца ханшаньщты атум. Юхлы кэщав лупас, хути там вер вантман тайлы па там ванан ши туңматлы. Вантэ, Госуслугайт хуват ипуляң вера ар ханнехэ тохтура ханшаньщты вуратас. 2023-мит олн 6 537 646 арат пүш округ мир ханшаньщас.



Русская кэртан мир ямалты не Л.Н. Покачева

Путар ханшас:
Ирина Самсонова

Ёмвошн Ас потты тылӑшн 17-мит хӑтлӑн «Центр молодёжных проектов» хуца ӑктупсы вӑс. Шци ӑктупсы «Гражданские инициативы регионов 60-й параллели» вӑн мирхот пурайн лӑщӑтса. Увӑс мир некоммерческой организацияйт ӑх вӑнлтылты хӑр хуца путӑртса, муй вӑрн «Организация Объединенных Наций» (ООН) хуца экономической па социальной совета консультативный статус ӑша павӑтты пӑта вохты непек хӑншты.

Увӑс мир оса тӑхет ӑх вӑнлтылты хӑр



Вӑнлтылты хӑра юхтылум ӑх. П. Молданов верум хур

Тӑм ӑктупсийн Гульвайра Куценко путӑр верӑс, лӑв «Информационно-образовательная сеть коренных народов «Львыоравӑтльан» хуца кӑща имия вӑл.

Югра мӑвев эвӑлт тӑм ӑктупсы хуца «Югра лыдӑнуптӑты» тӑхийн рӑпитты ӑх вӑсӑт. Шцит вице-президент Екатерина Жукова, (лӑв хотӑн ӑхдал пида «Хунзи» община хуца рӑпитл), айлат ӑх пида рӑпитты вице-президент Виктор Банк, Лангепас вошн айлат ӑх тӑхи кӑща лӑнкар хӑ Виктор Заяц, хӑнты ясӑнӑн айкелӑт ӑкӑтты па хӑншты хӑ Пётр Молданов па Ирина Сопочина. Ирина вӑнт кӑртӑн вӑлты ими, хотӑн ӑхдал пида йис хӑнты вӑлупсийн иса пӑш вӑл.

Ямало-Ненецкой автономной округ «Ямал-

потомкам!» увӑс ӑх асоциация эвӑлт щӑта лӑнкар хӑя вӑлты ики Иван Сандрин тыв юхтылӑс.

Юхтум ӑх ООН хуца вӑлты Консультативной статус олаӑнн путӑр хӑлӑнтсӑт, муй вӑрн шци статус ӑша павӑтты, муй вӑрн па муй пӑта шци тӑхийн шимӑщ вер верса.

Тӑм хӑтлӑтн 6500 сыр-сыр тӑхи консультативной статус тӑйлӑт, шци кӑтн Российской Федерация эвӑлттӑп 71 организация. Щӑта вӑлты ӑх арсыр верӑт верлӑт, тӑх ӑх нявремӑт пида рӑпитлӑт, тӑх ӑх мӑшӑн хуятӑт пида вулкемӑлӑтпа арсыр верӑт верлӑт. Шци кӑтн тӑп вет тӑхи – шцит мӑн мӑвевн вӑлты арсыр мирев пида рӑпитлӑт, йис верӑт, йис вӑлупсы шавиман тӑйлӑт.

Россия эвӑлт вера шимл, некоммерческой тӑхи шив луӑман вӑл. Америка мӑв

пела ки вантты, щӑта 1100 тӑхи шимӑщ статус ӑша павӑтсӑт. Гульвайра Куценко лупӑс:

» Мӑн шци мурт шимл ӑх щӑта тӑйлӑв, шци пӑта лупты ясӑев иса пӑш мира ӑн сащл, путӑртты нумсӑв иса ӑн хӑлла.

Шци пӑта арсыр некоммерческой тӑхета пилтӑшты мосл па шци тӑхия луӑнты па дыв тӑйты ясӑндал, нумӑслал олаӑнн щӑта путӑртты. Шци верӑт лӑщӑтты пӑта лыпат хойты тылӑшн мир яха ӑктӑшийлсӑт. Шци ӑктупсы версӑт «Информационно-образовательная сеть коренных народов «Львыоравӑтльан», «Федеральное агентство по делам национальностей России», «Министерство иностранных дел Российской Федерации» па

«Дом дружбы народов» хуца рӑпитты ӑх. Дыв федеральной национальной автономия ӑх яха ӑкӑтсӑт па дывты вӑнлӑтты пӑта вӑн мирхот верӑнтсӑт. Шци мирхота Россия арсыр мӑв сӑнӑтн вӑлты национальной культурной автономия верӑт пида рӑпитты ӑх юхтылсӑт.

Елды па путӑр тӑты ими лупӑс, муй вӑрн ООН консультационной статус ӑша павӑтты пӑта непекӑт хӑншты, лӑв ясӑлӑн, «Югра лыдӑнуптӑты» тӑхи шимӑщ вер верты яма пӑкл. Шцирн тӑта рӑпитты ӑх пиштӑйты пилтӑт шци мӑвӑтн верты мирхотӑта янхты, па дыв ясӑел, нумсӑл щӑта ӑха павӑтты. Муй вӑрн «Югра лыдӑнуптӑты» ӑх шив тӑты, Г. Куденовна сырышӑк Югра мӑв кӑща Наталья Комарова пида путӑр тӑйс. Шци кӑща имийн лӑв тыв шци вохса тӑм путрӑл, путӑртты пӑта.

Шӑлта па Г. Куценко путӑртӑс, йис верӑт лӑщӑтты па йис нумсӑт така тӑйты ӑх кӑтн муйсӑр ӑх шци консультационной статус тӑйлӑт, шцит Увӑс мӑв, Сибирь па Дальний Восток шуши мирӑт Ассоциация па Россия финно-угорской мирӑт Ассоциация ӑх.

Шци юпийн па путӑртум имев «Львыоравӑтльан» тӑхи олаӑнн ясӑн тӑйс. Муйсӑр верӑт щӑта вӑлты ӑх верлӑт, муйсӑр нумӑсн вӑллӑт па муйсӑр ясӑнӑт ООН хуца путӑртсӑт. Шӑлта па ӑктупсыя юхтум ӑх сыр-сыр верӑт олаӑнн иньщӑссӑт.

Путӑр хӑншӑс:
Пётр Молданов



РҮЩ НЕ АС-УГОРСКОЙ ЯСҢҢҢАН ДЕРАМТАЛ

Там ванан Ёмвоша Москва вош эвэлт рүщ не Наталья Кошелюк юхтылдас. Лүв учёноя вэл, тата ханты па вухаль хуятат пида вэйтанылдас, дыв пидэла путэртас. Лүв «билингвизм» (кэт ясңуп) щирн ханты па вухаль ясңат дерамтал.

Наталья Москва вошн «Высшая школа экономики» тэхийн рэпитл, манум одн филологической наукайт кандидат нем холумтас. Хутыса лүв Ас-угорской ясңат дерамтты питас, щидэлаңан щиты лупас:

» Ма Томской государственной университетн «Культурология» тэхидэлаңан магистратураин па аспирантураин вэнд-тылдсум. Щидэлаңан щиты лупас:

ясңат дерамтты учёной не Юлия Викторовна Норманская пида рэпитсум. Лүв манема лупас, хути уральской ясңат дерамтты моул. Вухаль ясң хуваат тест яма версум па щидэлаңан щиты лупас. Диссертация непекем «Первые кириллические памятники на мансийском языке XVIII-XX веков» нем тайс. Щит катра непекем хуваат ханшсум. Ма вухаль ясңан арсыр путрупсэти киникайт уша паватсум, тэса лүнайтсум. Вухаль

ясңат словарят щирн вэндэлаңан. Ханты ясң иши еша вэдем. Вухаль щирн путэртты анхошлум, тэп щидэлаңан еша хэллум. Там одн ма «Высшая школа экономики» тэхийн рэпитты питсум. Тата йилуп рэпатаин ма́сыюм. Интам дерамтлум, хутыса ханты па вухаль эх рүщ щирн путэртлэйт, дыв ясңел рүщ эх киньши и хурасуп муитэ. Щирн там мирнаңан вэлты мува юхатсум. Ин нэмаслум, елды па тыв юхтыылдыт питлум, Югра

хувааттын ай кэртата йнхты моул, щата вэлты хантэт па вухалыт пида рэпитты питлум.

Моул лупты, Наталья Андреевна олаң пүш Ёмвошн вэс, олаң пүш Ас-угорской мират пида путэртас. Лүвела муң мувев шеңк мэстас. Тата лүв уша верас, шуши мират итэх пүквейт еша депта путэртлэйт. Елды а́ктум путрат дерамтты питл па йилуп научной непекем щидэлаңан ханшал.

Путэрт ханшас:
Надежда Рагимова

АЙДАТ ЭХ РЭТ ЯСҢАТ ШИРН КАССАТ

Там ол Ас потты тылдэщ олаңмит хатлан округевн профессиональной образовательной тэхетн вэндтыылдыт айдаат эх күтн увас мират рэт ясңатн олимпиада верантсы. Там вер Ас-угорской институтн рэпитты хуятат лэщатылдас.



Ёмвош технолого-педагогической колледжаңан вэндтыылдыт эвет иши кассат

Колледжа́тн вэнд-тыылдыт айдаат эх ханты, вухаль, юрн ясңатн кассат. Иса там пүш 75 хуят олимпиада щирн рэпата ханшас. Лыв эвэлтэда ханты ясңан – 39 айдаат эх, вухаль ясңан – 31 хуят, юрн ясңан – 5 хуят. Рэтысңатн Сэрханл, Нуви саңхум вош, Лаңки пос, Игрим

вош, Нижневартонской па Ёмвош колледжа́тн вэндтыылдыт айдаат эх рэпатайт версат. Иса рэт ясң хуваат (50 балл) яң задания вэс, ханты литература хуваат (50 балл) 11 задания версат па иса луваттын сот балл еша паватты моул. Ханты ясңан хэлум

олаңмит тэхидэлаңан Сэрханл па Игрим политехнической колледжа́ннан хуши вэндтыылдыт эвет вүсат. Щит Зарина Лозямова (Сэрханл) – 68 арат балл, Милана Рыноква (Сэрханл) – 63,5 балл, Мария Штакина (Игрим) – 60 балл еша паватсат. Кэт эви ханты ясң касум путрупсыин па и эви сэр-

ханл путрупсыин ханшас. Вухаль ясңан немхуят олаң тэхет ан вүс. Юрн ясңан и хуят нух питас, щит Юлия Айваседа, лүв 77,5 арат балл еша павтас. Ас-угорской институтн ханты ясң ахтын рэпитты не Ф.М. Лельхова верум рэпатайт олаңан путэртмадн айдаат эха лупас:

» Там ол студентат ямашак кассат. Ищиты аршак айдаат эх там пүш олимпиада ханшас. Щит шеңк ям! Муң лаңхалүв, дэлаң нын йилуп одн иши рэт ясңат щирн ат кассаты. Щиты нын рэт ясңан уша верлэты. Мулты иньщасупсы тайлэты ки, ханшаты муңева.

Щидэлаңан Ас-угорской институт сайт хуца вантты рэхл.

Путэрт ханшас:
Надежда Вах

Васы мӑнты тылӑщ 23-мит хӑтлӑн оса верӑт тӑты хӑнты ики Александр Михайлович Константинов 75 ола йис, щипӑта Ас потты тылӑщ 4-мит хӑтлӑн «Торум Маа» немпи катра пурмӑсӑт лавӑлды хотн етнхот лӑщӑтман вӑс. Щит кӑтӑн тӑсӑн: «Торум Маа» музейн наука верӑт тӑты кӑща лӑнӑр не Раиса Решетникова па «Емвош ӑх» ариты-якты тӑхи кӑща не Фаина Иштимирова. Етнхот ӑмща лӑщӑтман вӑс, щит тӑты неӑнӑн Александр Михайлович Константинов вӑлупсӑл, олаӑн иньщӑссӑн, лӑв юхлы тӑх щосн ариман путӑртӑс.

Вӑлупсӑл хӑват шуши мир суртӑт тӑнӑматл

Мет сыры ӑнӑел-ӑщел олаӑн иньщӑссы, лӑв ястӑс:

» Ӑнӑем Тюменской область Армизонской районӑн сема питӑс, енмӑс. 10-мит класс етшуптумал юпийн лӑв Увӑс мӑва рӑпитты китсы. Сӑрханл район Сытомино кӑрта рӑпитты юхтӑс. Щипурайн тӑта хӑл па вой велпӑслӑты вер, вӑлды тӑщ лавӑлды вер яма лӑщӑтман вӑс. Лӑв тӑта вух лӑнӑтты па мӑты неӑа рӑпитӑс.

Ащем Манстӑр район Шӑнш вош эвӑлт вӑс. Вулаӑн Отечественной дӑлын дӑлясӑ, мӑшитман юхи керлӑс. Лӑв Сытомино кӑрта рӑпитты китсы, щӑта ӑнӑем пилӑ вӑтӑна йис. Мӑн семьяевн ма па апщем сема питсумн. Щӑлта ащем йиӑка питӑс.

Тӑм етнхот пурайн ӑнӑел-ӑщел нӑмман щира рӑт хотӑл олаӑн ар арийс.

Тӑмхӑтл мӑн, мойӑ ӑх, яӑ ола юхлы верум радиопередача хӑлӑнтсӑв. Щӑта вӑтаӑ шуши ӑх А. Константинов олаӑн йм ясӑт лупсӑт. Лӑв хулыева путӑртсӑт, хути Александр Михайлович шуши мира нӑтл, суртӑт тӑнӑматты нӑтл.

Александр Константинов ай пурайл олаӑн «Кӑм катла, ма етлум...» ар ариман лупӑс, мӑтты ки, катра пурайн иса йм вӑс – вӑнлӑты хуят мир пелы сӑмӑна вӑлды вӑнлӑтӑс,



^ А.М. Константинов па Р.Г. Решетникова

кӑтӑлн ар йм хуят вӑс.

Тӑмхӑтл А.М. Константинов ӑшколайн вӑнлутум пурайл олаӑн нӑмӑлмӑслӑ:

» Ма ай кӑртемм ӑшкола ӑнтӑм вӑс, щирн кашӑн хӑтл нӑл верста вӑнӑн вӑлды вошӑн ӑшколая хӑхӑлсум, тӑл пурайн лухн яӑхсум. Щиты айтӑлн ӑрӑна-щомӑна йиты вер пелы сӑмӑна вӑсум, интӑм ищи тӑлн лухн хӑтӑтӑлӑлум, шуши мир кӑсупсӑтн кӑслум. Иса хӑннехӑ вӑлупсӑл хӑват рӑт ӑшколайл нӑмман тӑйлӑлӑ, ма ищи. Ийха вӑнлтылум ӑхлӑм пилӑ тӑх пурайн вӑйтӑнтыйллум.

Елды лӑв лупӑс:

» Челябинск вошн культура институт етшуптумем юпийн режиссӑра йисум, Урай воша юхӑтсум. Нӑмӑссум, мосӑн, театр верты. Тӑп вошӑн компартия ӑхн вохсыюм

па инструктора рӑпитты партсыюм. Щиты немулт пурайн режиссӑра ӑн рӑпитсум, тӑп режиссӑриты вӑлупсӑм лӑщӑтсум, ма, вантӑ, юнтты хӑ.

Щиты вӑлупсӑл хӑват хӑс мултас ола арсыр тӑхет кӑщӑя рӑпитӑс. Етнхот пурайн радиопередачайн ар хуят лупсӑт, Александр Михайлович округевн увӑс мир оса тӑхет тывты пӑта ар ӑр пунӑс. Лӑв ар ола шуши мир вӑна ювум ӑх тӑхи кӑщӑя вӑл.

Яӑ ола юхлы вӑлум передача вухӑл мир поӑт Андрей Тарханов щиты лупӑс:

» Югра мӑвевн немулт шуши мир ай кӑрт ӑнтӑм, хута Александр Михайлович ӑн вӑс. Ма лӑв пилӑла Нефтеюганск вош тывум пурайн, Сӑрханл вошн тӑтӑн хопӑт яӑхты хот пӑншум пурайн вӑй-

тантыйлсум, щипуampi и пӑш вухӑл мир верӑнтум хӑ Пӑтр Шешкин хотн шивӑлӑсем. Мӑнем ӑмӑщ, лӑв щипурайт сӑмӑн ӑр тӑйл нӑшӑя питум хуята нӑтты, йм ясӑт лупты. Тӑх пурайн лӑв пелӑла ванттемм уша верлум, лӑв, мӑтты ки, оса верӑт тӑты пӑта сема питӑс. Ма хӑвн щимӑщ йм па ӑмӑщ хӑннехӑ пилӑ дӑхсӑна вӑллум. Александр Михайлович Тӑрум Ащи эвӑлт иса муй тӑйл, лӑлн хӑв йис уяна-пищӑна вӑлды.

Тӑм етнхот пурайн мойӑ ӑх Александра Михайловича ар хошум ясӑт путӑртсӑт.

Александр Михайлович айтӑлн лухн хӑтӑтӑлӑты, вӑнт хӑват шӑшты, хӑл велпӑслӑты верӑт сӑмӑна тӑйл. Щипурайн лӑв хурамӑн мӑв-авӑт пелы вантӑл па арийл. Тӑмхӑтл «Емвош ӑх» немпи ариты неӑт лӑвела «Ма мӑвем» Алексей Сенгеповӑн хӑншум ар арисӑт. Щӑта хурам Югра мӑвев олаӑн хӑншман вӑл.

Юхи хӑшум артӑн ийха шай яньсӑв, елды мойӑ ӑх лӑвела ар йм ясӑт путӑртсӑт.

«Хӑнты ясӑн» па «Луима сӑрипос» газетӑйӑлӑвн рӑпитты ӑх нӑӑена, Александр Михайлович, ищи 75 ола ювмен пӑта ар тӑпӑн ясӑт китлӑт. Елды ищиты щипураӑна шуши мир йис вӑлупсы лавӑлман тӑя, хӑв йис, хӑв нӑпӑт тӑлаӑна вӑла!

Путӑр хӑншӑс:
Людмила Гурьева



Арсыр мўвев сўңат эвэлт пәщта вўс

Ас потты тылāщ 16-мит хātлāн ма рәт-неңиём Тамара Андреевна Нахрачёва 65 ода йис. Лўв Ёмвош округ «Ветеран труда» нем тāйл.

Тамара 1976-мит олн Томской область Колпашево вошн тынесты вера вәндтйылмал, юпийн Нижневартоск воша рәпитты юхтās. Мет сыры «Увās мўв» немпилапкайн тынесты неңа вәс, щāлта пәщтайн рәпитты нумās верās.

Щиты лўңāн 1977-мит олн Тамара тухлāң хопāt йңхтытāхийн «Отделение почтовой связи №13» рәпитты олңитās. Олāңн оператора вәндтылās, щāлта оператора йис, 1979-мит олн васы мāнты тылāщ 1-мит хātлāн тām тāхи кәщя павātсы.

1980-1983-мит олātн Свердловск вошн нуви тўт вўщитты техникумн вәндтылās. Щи юпийн юхлы пәщтаела рәпитты керлās. Лўв СССР арсыр мўв сўңат эвэлт посылкайт па пищмайт пида вән хирāt алтылās. Вантэ, Самоглор пўңālн мўв илпи питы вуй вāйтум пура вўш эвэлт арсыр вошāt эвэлт мир юхтыйлды питсāt, хуйтат мўв илпи питы вуй талсāt, хуйтат Нижневартоск вош омāссāt. Пәщтайн лавāрт рәпата, лўв вева йис.

2009-мит олн рўтьщāты мāнмал, юпийн вош пў-ңālн дачайн арсыр ово-щāt енмāлды питās, щāлта



▲ Т.А. Нахрачёва

еплāң летутāt кавāртāl. Евгений пухл шеңк яма нētл. Ин Гриша хилэл ищи нētл. Еша рўтьщумал юпийн йилпа рәпитты мāнās – «Скорая помощь» хуща санитарка вәс, ин «Айлāt ёх тāхи» хуща хотхār люхитл.

Тамара рәт неңиём, сема питум хātлән пида! Елды хўв йис тумтака вә-ла, рәтлāнн нāң сāmāна тāйлдыңн!

Елена Соломина
Хāнты ясāңа тулмащтās:
Людмила Гурьева

Маша Курикова Полнавāt кәрт па ашкола олāңн путāртās



▲ Вāйтантусыя āкмум мир

И.Ф. Пермяков немпи Полнавāt кәртāң ашкола вәндтāты ёх па нявремāt «Вўт ашколаен олāңн путāрта!» немпи Россия мўвтел мир кәсупсийн кәссāt.

Тām кәсупсийн Маша Курикова кәсās, лўв па ол ашколая мāнд. Тām хāнты эвие Полнавāt

кәртāl, па ашкола олāңн ай тәс. Кәсупсы сухнум юпийн лўв сертификат непек еша холумтās, лўв



▲ Маша Курикова путāртāl

вәндтāты неңāl, Ольга Ивановна Курикова ишāкты непекн мāsы.

Мослупты, щи кәсупсы Россия мўв арсыр мирāt рәт ясāt тәты институт Якутской филиал ёх тәлāt. Щит лэщātлды, ләлн па мирāt ат вāйтсāt, муй

щирн Увās мирāt нявремāt айтелн касālман рәт ясāt вәндтālāt. Щи кәсупсы васы мāнты тылāщ 10-мит хātлāн олңитсы, Ас потты тылāщ 5-мит хāt-лāн сухнās. Щиты 300-кем няврем кәсман вўт ашколайлал, вўды таш лавālты аңкидал-ащидал, хурамāң рәт мўвдал, олāңн ай кинайт хāншсāt па альсāt. Кашāң кәсум няврем сертификат непек, 1,2,3 тāхета питум эвет-пухāt ишāкты непекāt па тынāң пурмāsāt еша холумсāt.

Валерия Туполева,
10-мит классāн
вәндтйылды тэви



Ёмвошн «ЮграТур 2023»



▲ Югра кәщә ёх вандтупсы вантлёт



▲ Россия мўвев сенатор А.В. Новьюхов вандтупсыя юхтәс

Ёмвошн Ас потты тыләщн 10-11-мит хәтлңәнән «ЮграТур 2023» вандтупсы вәс. Щит «Югра-Экспо» хуща пўншса. Тәмәщ вер Югра кәщә ёх ләщәтсәт.

Вандтупсы кәт нумәс щирн верум уг. И нумәс – щит муй вўрн па мўв ёх мўң мўвев вантты пәта тыв хущты, кимәт нумәс – муй вўрн мўң мўв мирев па мўвәт вантты хущты. Тәмәщ вандтупсы хўв мәр эвәлт кашәң ол мўң мўвевн верәнтлә, тыв сырсыр Россия мўв сўңәт эвәлт арсыр мир әктәщләт.

Тәм ол па хон пеләк мўвәт хуща вәлты ёх тыв юхтылсәт, щит Чехия,

Болгария, Словакия па Китай мўвәт эвәлт.

Тәм форум мәнумн арсыр верәт вәсәт: мастер-классәт, ёңта пәсанәт, турпродукт вандтупсәт, мирев пәта вәндтылды тәхи па вәс, щәта пугәртсы, муй вўрн мосл туризм хуща рәпитты.

Вандтупсы олңитум елпийн Югра кәщә Н. Комарова ям вўща ясаң мир пелә пугәртәс.

» Мўң 22 ол мәр «ЮграТур» нәмуп вандтупсы верәнтлўв, тәм вандтупсыин кашәң ол мўң Ёмвошн яха әкәтлаюв. Тәта мўң арсыр верәт олаңән пугәртлўв, арсыр нумәслўв вәлупсы верәт вәнта тәллўв, ин мўң па хон пеләк ёхлўв пида и нумәса питлўв, муй вўрн туризм верәт елды тәты. Тәм хәтл арад пеләк Югра туроператорәт па Китайской народной республика ёх кўтлән яха рәпитты нәпекәт хәншсәт. Ин мўң виза таклы Китай мўва яңхты пищ тәйты питлўв, – пугәртәс Югра кәщә нәцев.

Щәлдта па айкел тәс, лупәс, Ростат щирн мўң Югра мўвевн тәм ол 9 тыләщ мәнум юпийн 25% киньща аршәк мир мўң Югра мўвев вантты пәта юхтылсәт. Щәлдта па лўв лупәс, мәтты тәм ол вандтупсыин вера мосты верәт олаңән пугәр мәнәс. Щи кўтн щит кимәтмит всероссийской этнографической кәсупсы. Тәм ол 73 вохты нәпек щи кәсупсыя Россия мўв сўңәт эвәлт 16 уг юхтәс. Щи кўтн 30 заявка хәншум

ёх нух питсәт па тәта дыв этнографической туризм верләл, вандтәты питләт.

Югра кәщә нәцев па айлат ёх олаңән пугәртәс. Иилпа енумты нявремәт па айлат ёх тәм мўвн сема питсәт, тәм мўвн енумләт, тәм мўвн елды рәпитты, елды вәлты питләт. Щи пәта вера мосл дыв сәмдал, дыв нумәсдал мўң йиңкев-мўвев пелә керәтты. Округев хуща тәм луват ям вер пәта «Социальные сертификаты для путешествия детей» проект верман вәл. Щи вер вана вўсы па Россия экономика Министерства хуща рәпитты кәщә ёхн вухн нәтса. Тәм вер ки иса пўш яма ләщәтты, щирн әшколайн 5-9-мит классәтн вәндтылды нявремәт мўң Югра мўвев хўват яңхты пищ тәйты питләт. Тәм ол щимәщ проект ләщәтты олңитса, тәм вер мухты 5 щурәс няврем мўң мўвев хўват вошәт, кәртәт вантман яңхсат. Щи вер олаңән нявремәт вера ар ям ясаң лупсәт, әңкидала-ащидала нявремәл тәмиты рўтьщәты вер пелә вантты ищи әмәщ, па



▲ Юхтум ёх летут пўләт арталәләт



ВАНДТУПСЫ ВӐС

туроператорӑн тӑм вер вана вӑсы.

Щӑлта па Югра кӑща имев мӑн миров кӑтн иса пӑш нумӑсн тӑйты ясӑт лупӑс:

» Югра шивалӑты – Россия сӑмн тӑйты.

Ши ясӑн кӑрща алуман тӑм хӑтлӑтн Югра миров Москва хуща «Россия» немуп ванлтупсы хуща рӑпитлӑт.

Форум олаӑн хӑтлӑн «Туризм как новая патриотика – смыслы, вызовы и новые тренды регионального развития» вӑн мирхот вӑс. Тӑта ясӑн тӑйсӑт Югра муниципальной мӑвев ӑх, отраслевой департамент хуща рӑпитты ӑх, туризм хуща рӑпитты мир па арсыр туроператорӑт.

Россия Минэкономразвития хуща вӑлты «Департамент развития туризма» тӑхи кӑща лӑнӑкӑр хӑ Андрей Ушаков путӑртӑс, муй вӑрн федеральной ӑх туристической проектӑта нӑтты питлӑт, 2024-мит одн арсыр мӑвӑт пӑта субсидия вух дыв мӑлӑт, щит «Туризм и индустрия гостеприимства» национальной проект мухты.

Югра кӑща лӑнӑкӑр хӑ Сергей Черняев путӑртӑс:

» Туризм мӑн мӑвева вера мосл, щит вух тӑты вер. Кашӑн ол туристӑт арашӑк йилӑт, дыв пӑтӑла увӑс мир йис вӑлупсы ванлтӑты щира программӑйт верлӑв.

Форумн 99 ванлтупсы

тӑхет верман вӑсӑт. Тӑта миров кӑтлӑн 26 йӑх рӑпитты непек хӑншсӑт, щит югорской туроператорӑт па Китай мӑв эвӑлт юхтум ӑх.

Мӑн кӑщайлӑв кутлӑлн ищи йӑх рӑпитты непекӑт хӑншсӑт. «Фонд развития Югры» кӑща хӑ Роман Колупаев кашӑщты непек хӑншӑс Советской район хуща вӑлты «Усадьба» рӑтӑщӑты тӑхи ӑх пила па Екатерина Тайлакова пила, лӑв «Агентство креативных индустрий «Куй» хуща кӑща имия рӑпитл.

Мойӑн ӑх пӑта арсыр ванлтупсӑт вӑсӑт, ӑмӑщ тӑхет рӑпитсӑт (ампӑт, снегоходат, дайверӑт, VR-путешествия па арсыр тӑхет). Юхтум миров пищ тӑйсӑт Югра хӑват VR-путешествия яӑхты, мӑвев хуща верум лыптӑн, шай яньщты, сорт хӑлӑн па ӑхум воньщумутӑн, нянь леты, хаска ампӑт пила юнтты, репӑт ӑхтыя нух вӑратыйлты па вӑн вездехода омсӑлтыйлты. Ши пищӑт Югра мӑва юхтыйлты туристӑта мосты верӑт.

Юхи хӑщум хӑтлӑн рӑтӑщӑты верӑт хӑват II-мит Всероссийской кӑсупсийн нух питум ӑхлӑв ишӑкты непекӑтн мойлӑсийт. Мойӑн ӑх пӑта «Портреты Фа Диез» (Ёмвош) вокально-инструментальный ансамбль ӑх арисӑт.

Людмила Алфӑрова «ЮграТур» ванлтупсы олаӑн щиты лупӑс:

» Мӑнӑма вера ӑмӑщ вӑс, хӑн тыв юхӑтсӑт арсыр ӑх,



» Югра мӑв ӑрнас сухӑт ванлтӑлӑйт



» Верӑн ӑх лӑпи верлӑт

ма кимит ол жюри хуща рӑпитлдум. Лупты лӑнхалдум, Россия мӑв арсыр тӑхет эвӑлт хӑннехуятӑт тӑмӑщ кӑсупсыя юхӑтсӑт па мосл лупты, мӑн регионӑв вера ар вер верӑс, Югра мӑвев проектӑт нух питсӑт, ши пӑта мӑнӑма вера ӑмӑщ вӑс. Жюри хуща арсыр тӑхет эвӑлт юхтум ӑх вӑсӑт. Тӑм ол Мегионской музей нух питӑс, дыв «Хӑтлые» ӑмӑнхӑтл па мет ям этнографической верӑт верлӑт. Па тӑта ям рӑтӑщӑты верӑт Нефтеюганской районӑн вӑлты «Феникс» тӑхи ӑх ванлтӑсӑт. Мет ям этнографической маршрут лӑв саттӑла вер тӑты хӑ Тарас Петрович Марушак лӑщӑтӑс, лӑв Светлана имел пила Нефтеюганской район хуща рӑпитлӑнӑн, ӑмӑщ верӑт верлӑнӑн, рӑтӑщӑты верлӑл, яма мӑнлӑт, муй вӑрн мосл,

щиты тӑса верлӑт. Жюри ӑх худыева дыв пӑтана ӑш алумсӑт.

ӑмӑщ вӑс «Катра Сӑрханл» тӑхи ӑхн верум сувенирӑт вантты, Екатерина Тайлакова лӑщӑтум «Куй» немпи вер ищи нух питӑс. Тӑм ол ар ям рӑпатайт вӑсӑт. Тӑмӑщ ванлтупсы кашӑн ол верӑнтла, мӑнӑма вера ӑмӑщ тӑм тӑхийн вӑлты. Югра мӑвевн этнографической рӑтӑщӑты верӑт мет сырья мӑнлӑт, мӑн мӑвев йис верӑт вера кӑрща тӑллӑв, тӑта тӑм верӑт мет яма лӑщӑтман вӑллӑт, ши олаӑн жюри хуща вӑлум ӑх путӑртсӑт. Мӑн мӑвевн увӑс мир пӑта ар вер верлӑт.

Путӑр хӑншӑс:
Петр Молданов



^ Эвет юнтупсы ванлтӓдӓт



^ Акань ёнтты вер ванлтӓды

Арсыр мирӓт аканят олаңан путӓртсӓт

Тӓм ванӓн Ас потты тылӓщ яңмит хӓтӓлн «Лылӓң союм» ай ёх вӓнлтӓты тӓхийн вӓн мирхот версы. Щит «Лылӓң союм» тӓхийн нявремӓт вӓнлтӓты ёх лӓщӓтсӓт па версӓт. Олаңлн дыв ванлтӓсӓт, финно-угорской мирӓт муй хурпи аканят тӓйлӓт па хутыса щит ёнтлӓт. Щи аканят катра пурайн па ин вӓнты мӓн округев музейтн вӓллӓт.

«Лылӓң союм» хотн рӓпитты нявремӓт вӓнлтӓты неңӓт И.Б. Белявская, С.М. Астапович, О.С. Давыдова па О.М. Норова ин марийской, удмурской, коми-пермяцкой, вепской аканят олаңан путӓртсӓт па альсӓт, муй хурпи аканят финно-угорской мирев тӓйлӓт, муй элты сух-шӓкӓт, турн, юх, варс верӓнтсӓт, муй щирн Ас ёх, нӓм па увӓс мӓвн вӓлты хӓннехӓйт акань ёнтсӓт.

Тӓм хӓтлӓн мирхота ӓшколяйтн па садикӓтн рӓпитты неңӓт ӓкӓтсӓйт. Дыв путӓр хӓлӓнтсӓт, муй щирн айлӓт ёх пӓта хӓнты па вухаль ясӓнӓнӓн урокӓт тӓна верты, хутыса хӓнты путрӓт рӓщ ясӓна тулмащӓты.

Нявремӓт вӓнлтӓты не Майя Макарова шеңк мосты верӓт верл, лӓв айлат ёх рӓт ясӓна вӓнлтӓты пата киникайт хӓншӓл. Тӓм мирхот пурайн лӓв

путӓртӓс, муй щирн рӓт ясӓна вӓнлтӓты урокӓт ущӓлӓ верты. Лӓв ванлтӓс, муйсӓр пособияйт дыв верлӓт, хутыса юнтты щирн ӓшколайн урокӓт верты рӓхл, лӓлн ин ай нявремӓтн яма ӓт хӓлсӓл. Майя Ефимовна тӓм презентацияйл пида округев кӓртӓта яңхмал. Лӓв яма путӓртсӓлӓ, муй щирн нявремӓт ӓшколайн па садикӓн вӓнлтӓты мосл, па лӓв верум киникайлӓл лӓнӓтты па елды тӓты. М.Е. Макарова ястӓс, муй щирн ин стойбищная ӓшкола-сад хотн вӓлты ай нявремӓт вӓнлтӓты питлӓт, дыв пӓтӓла йилуп верӓт лӓщӓтлӓт. Ин мӓн мӓвев карта лӓщӓтсӓт, шив па карточкайт хӓншман вӓллӓт, щит округевн вӓлты войт па енумты юхӓт.

Щӓлта ясӓң путӓртӓс Светлана Астапович – лӓв ищи няврем вӓнлтӓты не,



^ Мирхот пурайн

ям тӓсн ёнтӓсты не, лӓв лӓщӓтман тӓйл ёнтум ям таш, шуши мир лӓмӓтты сухӓт. Лӓв ястӓс, муй хурпи аканят удмуртской мӓвн верлӓт па тӓйлӓт, щӓлта ванлтӓс, муй щирн шуши мир акань ёнтла.

ЩИ юпийн «Торум Маа» музейн рӓпитты не Раиса Решетникова путӓртӓс, муйсӓр аканят интӓм музейн шавиман тӓйлӓйт, щит хӓнты, вухаль па арсыр финно-угорской аканят. Кашӓң мир хущи юнтты шира, ритуальной па ар хурпи аканят вӓллӓт. Щитӓт сух, вӓлды сух, васы сух па арсыр сухӓт эвалт ёнтлӓйт.

Олеся Исаченко путӓртӓс, хуты интӓм дыв нявремӓт пӓта йилуп кӓсупсы

лӓщӓтсӓт. Шив нявремӓт арсыр финно-угорской мирӓт аканят ёнтты па китты верилӓт. Щи аканят пелы вантман уша йил, муй хурпи арсыр лӓмӓтсухӓт финно-угрӓт тӓйлӓт.

Ольга Давыдова мирхота юхтум ёх вӓнлтӓс, хутыса коми-пермяцкой акань ёнтты мосл.

Мосл лупты, ям арсыр путӓр мирхот пурайн уша павӓтсӓв, щӓта ар няврем вӓнлтӓты хуят вӓс, дыв йилуп верӓт олаңан уша версӓт, щи юпийн нявремӓт щи верӓта вӓнлтӓты питлӓт.

Путӓр хӓншӓс:
Светлана Сатина



Йис пурмәсәт тайты хот рәпата

Рәпатаём ширн Сүмәтвошн вәдмемн немасыя районәң йис пурмәсәт шавиты хота йңхсум, кәчайл пида вәйтантилдсумн па путремәсмән. Тәмхәтл ши тәхи кәща неңа Алёна Васильевна Леонова рәпитл.



А.В. Леонова

Алёна Васильевна, тәм путрев олңитты елпийн мәтты айкел ин нәң олңенән тыва, муйсәр тәхийн сема питсән па хута вәндтйлдсән?

► Ма Сүмәтвошн сема питсум, айтедн тата вәсум па енумсум, тата күтуп ашкола 2001-мит олң етшуптәсум. Ши киньща ашкола юпийн нумәс версум елды вәндтйлды. Тюменской государственной университетн экономической факультетн вет ол мәр вәндтәсыюм, диплом непекем мушатсум па юхи ши юхәтсум. Сырыя иса мәнәма мосты вер ән вәс па ши пәта 2006-мит ол вүш эвәлт Сүмәтвошәң нуви тут вүщитты тәхийн рәпитсум. Әхәт ши тәхи эвәлт Ханты-Мансийской банк хуца мәнсум, хута тәлаңтедн 12 ол мәр вух лүңәтты неңа вәсум. Щәлта ши тәхев ләп тәхәрсы па ма йилпа рәпата мәнәма кәншты питсум. Имудты пурайн ин Сүмәтвош районән «Комплексный центр обслуживания населения»

тәхийн 2020-мит ол вүш эвәлт рәпата мушатсум па иши вухәт лүңәтты неңа вәсум. Имудтыйн район йис пурмәсәт шавиты хотэв кәща ләңкәр неңа рәпитты вүсыюм па ши вүш эвәлт мәнәма мет әмәщ вер вәйтсум.

Тата мосванән велщи кәща неңа павәтсыюм. Ин йис пурмәсәт шавиты хотн араattelн 22 хәннехә вәл па рәпитл. Ши тумпийн Саранпауль вош па Лев юхан музей хотңән иши ийха мўң хуцева хәншман тайлдыңән.

Хән Сүмәтвош районәң йис пурмәсәт шавиты хот пўншсы?

► Мосл лупты, хути районэв хуши тәмәщ йис пурмәсәт шавиты хот Советской лащ пурайн 1979-мит олңтәп пўншсы. Мет оләң кәща неңа Наталья Елизаровна Филиппович вәлмал. Ши не сырыя Сүмәтвошәң райком КПСС хуца рәпитәс. Тәм хәтл вүш вәнты музей хотэвн вәлды хәннехуятәт хәнты, вухаль, сәран па рүщ мирәт йис пурмәсәт худыева ийха әкәтләт па щитәт унтасн сыр-сыр ванлтупсәт тата тәса ләщәтләт.

Сырыя катрая ювум павәрт хотн музей вәс па әхәт, 2003-мит олң, лүв йилуп кирмәщ эвәлт верум ләщкам хота каслуптәсы. Ши пәта сыр-сыр йис пурмәсәң ванлтупсәт тата ләщәтты веритлүв, ям арат хәннехуятәт кашәң пўш тыв юхтыылды питсәт.



Хәнты па вухаль неңәт ләмәтсукхәт



Шуши мир пурмәсәт

Алёна Васильевна, муйсәр ванлтупсәт верты хот йитәт ин тайләты?

► Мўң йис пурмәсәт тайты хотэвн кәт мет вулаң ванлтупсәңән вантты хот йитңән тайлүв, щит «Тәмхәтл вәлды верев, мәта утэв йис пураитн тывәс» па «Шуши мирәт вой-хүд велпәсләты па вүды лавәлды щирәт, лыв йис пурайн па тәм күтн вәлды верләл па муйсәр ләңхәта ши әхлүв вәлупсы хўватн эвәлсәт па пойкцәсәт».

Алпа, нын щитәт тумпийн арсыр ал ванлтупсәт вошәң әха верләты?

► Мўң кашәң ол мәр тәмәщ ванлтупсәт Сү-

мәтвошәң мир пәта йәмсыева ләщәтлүв, щит «Лыв мет олңән вәсәт» (мўв илли таш кәншум хуятәт эвәлт), «Урал Промышленный – Урал Полярный», «Сүмәтвошәң мўвев илпийн мушатум йис пурмәсәт», «Мўвәт-йиңкәт па хәннехә», «Вәлды-холты щирәт елды тайлүв», «Шуши мирәт ләңха эвәлды верәт», «Муй ширн Сүмәтвош тывәс?», «Муйсәр хәйт тәм Сүмәтвош әрн китсийт?», «Муй щирн катра Сүмәтвошн әл хуятәт вәсәт?», «Хути Советской лащ оләтн хәннехәйт вәлды веритсәт?» Щимәщ ванлтупсәт тәса ләщәтлүв!

Путәр хәншәс:
Владимир Енов



Ныюм ими вəлупсы олаңан

Ма ныюм ими Анастасия Васильевна Отшамова (Новьюхова) вəлмал пурайн мəнема арсыр əмəщ катра путрəт путəртəс. Лўв Вəн Шохан кəртəн Вогулка юхан лыпийн (Вəн юхан – щиты Ас мир əхн немн пунман вəс) 1930-мит олн вəн кер тылəщ 15-мит хəтлəн сема питəс.

Анастасия Васильевна щиты путəртəс:

» Мўң Вəн юханəв Сəк кев эвəлт ши йил, Сўмəтвош пелка ши мəнл. Шохан кəрт пўңəлəн щəта ванəншəк Ващ кəрт вəс, əңкем ими рəт мўвл – Кещлор əх кəрт. Щəта лапка, əшкола-интернат тəйсўв, хута ванəн вəлты кəртəт эвəлт нявремəтвəнлтылдсəт. Ма хəлум тəл ши əшколайн вəнлтылдсум, əңкемн па елды əн єсəлдсаюм вəнлтылдты, хəн ащєм сўтытытə тəса.



▲ А.В. Отшамова воньшумут əкəтты яңхəс

Ащел ики – Василий Яковлевич Новьюхов, лўв 1898-мит тəлн сема питəс. Лўв вўлең хуята вəс, 1937-мит тəлн норма план вермал рўвн «стахановец» немн юкантса. Ши вўраңан Сўмəтвош районəн эвəлт пушканəн мойлəса, ши пəта Самарова воша яңхəс. Əхəт па 1938-мит тəлн Омской УНКВД хуша сўтытытə тəса. Яйл ики Петра вəс па Ёмвошн хулт пелы тəсайт. Аңкел ими – Екатерина Александровна Новьюхова (Рябчикова) – 1895-мит тəлн сема питəс. Хəн икел сўтытытə тəса, лўв лапəт нявремлал пила хəщəс. Анастасия Васильевна ши пурайн нивл тəла йис, муй ши пурайн вəс, лўв яма нəмлəлэ. Лўв путəртəс:

» Ши 1937-мит тəл ар хуят мўң вəлты мўвев эвəлт сўтытытə тəсайт, 20-кєм хəннхə тəм кəртəт эвəлт: Вошпиртам кəрт – Вуртыпенковəт, Вəн Шо-

хан кəрт – Новьюховəт, Ващ кəрт – Рябчиковəт, Ай Шохан кəрт – Новьюховəт. Юхи нємəлт хуят щəлта əн юхтылəс. Ши пурайн пирəщ икет па имет нявремлал пила хəщсəт. Мўң щиты ши вəсўв шəк тўвман ши пурайн, рəпитты питсўв. Вой вєлты вəнта яңхсўв, холуп омəсты, тўт юх əкəтсўв, хəщум вўлылўв лавəлсўв, хулта па партсаюв əңкемн, ши вєр ши вєрсўв. Ши юпийн па колхоз Тўтлэвум кəртəн вєрса. Ващ кəртəн вəлум əшкола-интернат, лапка щив ши тəсайт ийха, па вəлты хуятəт щив вошəтсаюв.

Лўв и ял тəп тəйс – Семєн Васильевич Новьюхов. Лўв 1942-1944-мит олəтн лəлясты мəнəс па Польша мўвн пəрəс. Па ащел апши хə Андрей Яковлевич Новьюхов ищи лəлясты тəса. Лўв 1941-1943-мит олəтн Москва вош лєпн

пəрум мўвл вəл. Вəн əх хуятлал иса пəрсəт. Нєнəт хəщсəт па ши вəсəт ащилал па яйлал вəлупсы нумəсн тəйман.

» Аңкем ими Екатерина Александровна хўв вəс. Мўң эвет, вəн упилам Еня па Елена, па апши нєниєлдам Татьяна, Прасковья па Вера єнумсўв, икия мəнсўв. Хəн Тўтлэвум кəрта колхоза əкəтсаюв, əңкем ими нянь вєрты хотн хўв рəпитəс. 1973-мит тəлн Сўмəтвошн əнтəма йис, ин катра шəкəң тəхийн удəл, – лупəс Анастасия Васильевна.

Еша əхəтшəк лув икия Пəкəр кəрта мəнəс. Икел Алексей Филиппович Отшамов 1922-мит олн сема питум хə вəс. Лув лəлясты яңхəс па 1942-мит олн мəшмəлсы па госпитальн лекщитсы. Щəлта 1946-мит олн вєлщи юхи юхтəс. Лўв



▲ А.Ф. Отшамов



▲ А.В. Отшамова

колхозн рəпитəс, вўлы хотн пиркатира вəс. Яң тəл вўлы тащн кевн па кев пелəкн яңхсəт. Икел пила яртəяң няврем тəйсəңан.

Хəн вўлы тащн яңхты вудысəңан, Тəк кəрта вəлты юхəтсəңан. Щəта нявремлал єнумсəт, əшколая яңхсəт. Хəн пиршамəсайт, икел пила хўв Сўмəтвошн вєсəңан. Анастасия Васильевна 2016-мит тəлн Ас потты тылəщ 1-мит хəтлəн əнтəма йис. Мўң, рəт əхлўв, иса нумəсн ши тəйлəлўв, муй щирн ши пурайн вəсəт па рəпитсəт.

Путəр хəншəс:
Светлана Новьюхова



Рэт ясăң пида рэпитл

Там йисн ямкем ар ханнехэ рэт ясăң пида вэлупсэл хўватн вэл па рэпитл. Лыв кўтэлн Любовь Геннадьевна Возелова иши ям арат ол мър ханты мир йис путрэт, моньщят, вэлты-холты щирэт арталуман тайл.

Хашум олътн там нецев Ямал мўвн Пулңавят вошн «Центр изучения Арктики» не-муп тахи хуца научной верэт лэщятман рэпитл. Муши воша Лорвош районуна айкелэт акатты яңхемн, ма немасья лўв пилэда вэйтантайлсум па вэлупсэл муй рэпатайл олăңан иньщассем.

Любовь Геннадьевна, муйсър хоттел, ех хуца нăң сема питсэн, мата тăхийн енумсэн па хута ашколайн вэнлтыйлсэн?



Л.Г. Возелова аңкел пида Муши вошн. В. Енов верум хур

► Ма вўды тащятн яңхты ханнехуятат хоттел ех хуца сема питсум, иса айтелн щята вэсум па енумсум. Лапатмит ода ювмемен аңкемн-ащемн вэнлтыйлты тэсыюм. Питлор кертăң кўтуп ашкола-интернат хуца иса вэсум. Аңкем – Прасковья Ивановна па ащем – Геннадий Алексеевич Возеловăңан вэлты хўватн кев пелăкн «Горковской» немуп совхос вўды тащятн рэпитсăңан. Ма Питлор кертăң ашколаемн яртъяңмит классем етшуптумем пурайн мет олăңан нэмăссум Пулңавят вош педучилища хуца елды вэнлтыйлты. Щи пата арсыр мосты не-пекат ийха лэщятсум па щив китсум. Щи олътн айлат пухат-эвет худыева щи воша мăнсат.

Хэн па Пулңавта мăнты пурая йис, аңкемн иньщамсыюм: «Эвие, нăң худна шеңк ай, муй щирн щи луват вэн воша мăнлăн? Мосăң, ин тата ашколайн 10-мит па 11-мит классат етшуптăдăн

па щи юпийн велщи па тăхия вэнлтыйлты актăщлăн». Ма мăтты ки лўв ясăндал иса лавăлсум, имухты Питлор кертăң кўтуп ашколаемн елды вэнлтыйлты кашассум.

Мата олн нăң кўтуп ашкола етшуптăсэн, муй хурасуп ет щирн елды вэнлты нумсат версэн па муйсър вэн вошн вэнлтыйлтыя вўянтсэн?

► Щи киньща 1996-мит олн шеңк яма юхи хашум 10-11-мит классăн етшуптăсум па имухты Санкт-Петербург воша А.И. Герцен ики Российской государственной педагогической университетта мăнсум. Щята ма «учитель начальных классов» щирн иса вэнлтыйлты питсум. Вет ол сора мăнăс, вэнлтыйлты верем сухнуптăсем, диплом непекем еша павятсем па юхи юхатсум. Эхат «Управления образования» тăхия Муши воша яңхсум па мăнема рэпата кăншсум. Щи тăхи

кэщайт лупсат мăнема, хути тăм олн лыв ашколаелн няврем вэнлты ханнехэ тăрмал. Щалта ямсыева арталăсат Лорвош район луватн вэлты ашкола хотат па щимăщ айкел версат, хути тэп Ямкертан олăңмит па нълмит класат вўш вэнты нявремат вэнлты не мосл. Ма па еша нэмăссум па Ямкерт ашколая рэпитты мăнты ан кашассум.

Любовь Геннадьевна, мата тăхийн па эхат нăңена рэпата муцатсэн?

► Эхат Аксарка вошн Приуральской районан кўтуп ашкола-интернат хотн рэпатая вўсыюм. Щи тăхийн нявремат хатл мър лавăлты не щирн 2001-мит ол эвăлт па 2003-мит ол вўш вэнты вэсум. Иши пурайн мўң интернат хотэва округ «Институт усовершенствования учителей» тăхи эвăлт кэщайт юхтыйлсат па арталăсат, муй щирн мўң нявремат пида юхи маты урокат

ханты ясăңан лэщятлўв. Щи хатлăтн ма арсыр айлат ех пида рэпитсум. Щалта па Пулңавта «Институт усовершенствования учителей» хота ханты ясăң методист не щира вохсыюм. Йилуп верем унтасн вантсум, муй щирн ханты ясăңа па литературая айлат пухат па эвет округе ашколаитн вэнлтылты. Ин па араттелн, ийха ки лўңатты, щит 10 ол мър ма щит тăхийн вэсум, рэпитсум. Щи пурайн мўң нявремат вэнлты арсыр йилуп киникайт лэщятсўв па ханшсўв. Шеңк яма мăнема нэтсат ушăң-сащăң неңат, щит Валентина Неликовна Няруй, Галина Ивановна Вануйто, Галина Гавриловна Попова па па ех.

Иса 2014-мит ол вўш эвăлт Ямал округ мўвн Пулңавят вошн «Центр изучения Арктики» немуп тахи хуца научной верэт лэщятман вэллум. Щи пата А.И. Герцен ики Российской государственной педагогической университетн «Кафедра уральских языков» тăхи хуца 2018-мит олн аспирантура етшуптăсум. Тамхатл наука щирн ханшты «Фразеология хантыйского языка» не-пекем пида рэпитлум. Ин па Муши вошн арсыр айкел вой-хўл велпăс па вўды тащятн вэлум ханнехэйт эвăлт акатлум.

Юхи хашум ясăңатн вўтыщăлум лупты, хути рэтысăң пида вэлты-холты щиремн мăнема ал эмăщ рэпитты!

Путър ханшăс:
Владимир Енов



Томск вош эвдлт он-лайн щирн мўв олаңан уша верты хуят, учёной хэ, киникайт ханшты хэ Яков Яковлев лупас:

» Вячеслав, йилуп киникайл етты вер пата амтатылдум. Мосл лупты, тамаш моньщ моньщ хураман Югра мўвев олаңан уша верты рэхл. Вячеслав Кондинан ханшум моньщатн арсыр амаш войт «Торум Маа» ёмаш репн вэллэт. Мўң Увас мўвевн вэллўв, тата ар тылащ тал пура, щирн там моньщатн вэлупсы ар пелак талн вэл. Там киникайн хураман хурат ханшман вэллэт. Мосан, елды нын хушана щиех юхтыллэт, хуйтат ин щие моньщат хэлантлэт. Вячеслав, нан рўщ ясаңан моньщат ханшлан, щирн нанена Астафьев, Бианки, Пришвин, Паустовский па па мўв-ават олаңан ханшум ех путрат лўңатты мосл.

Людмила Алфёрова киникайн ханшум хурат олаңан иньщас. Вячеслав юхлы лупас:

» Ёмаш реп моньщат» киникаёмн хур ханшты не, Ас-угорской научной институтн рэпитты не Наталья Жеманская хураман хурат ханшас. Ма лўвела путартсум, муйсар хур кашан лопасн ханшты мосл, лўв щиты верас. Лўв хурдал эвдлт киникаём хурамана йис, щирн Наталья вэн пэмашипа лупдум.

Шуши мир литература дерамтты не Виктория Сязи лупас:

» Иса пурайн киника етты вер – щит вэн амат. Ин ханты хэйн Вячеславан Кондинан рўщ ясаңан ханшум непек етас, мўң патэва ищи вэн амат.

Ёмаш реп моньщат

Щимаш нем киника тэйл, мата ут там ванан рўщ ясаңан ханшты ханты хэ Вячеслав Кондин ханшас па еслас. Ас потты тылащ 5-мит хатлан «Торум Маа» музейн там киника алыты щира вэйтантупсы вэс. Щиттам тахи кэща не Людмила Алфёрова тэс. Лўв вўща вермалн ястас, Вячеслав щикўш Ёмвошн енмас, тэп хураман мўв-йиңк пелы саман ханнехэя йис, щие пата ар ол «Торум Маа» музейн рэпитталн моньщат ханшты питас. Там киникайн ханшман вэл, муй щирн Ёмвош и ёмаш репн ханнехэйт моньщ войт пида вэллэт.



Евдокия Нёмысова йм ясчат лупл

Ма лўв ханшум утлал мет сыры соцсетят хуша вантсум, амша йис, муй щирн лўв сора ханшал. Ин ханты па вухаль мир литературайн шимл хуят няврем пата ханшал. Катра пурайн Таисья Чучелина, Галина Слинкина, Мария Вагатова ханшас, ин немудт хуят ан ханшал. Вячеслав Кондин унтасн йилпа щие вер дьлнуптасы. Лўв, вантэ, мет олаң вошаң вэлупсы олаңан моньщат ханшас, щата ханнехэ войт пида путартал – щит ищи амаш – щит ханты па вухаль мирнан литература пата йилуп вер. Вячеслав Юрьевич, елды ищиты амша ханша!

Вэйтантупсийн Людмила Алфёрова карельской киникайт ханшты не Яна Жемойтелете ясаң лўңатс:

» Нявремат пата мет



Вячеслав Кондин киникайл олаңан ай тэл

амаш путрат – щит аңкетнащетн моньщум моньщат. Вантэ, дыв вэйтлэт, муй нявремата мет амаш, муй дыв тэса хэлантлэт. Амаш ки, дыв елды моньщты вохты питлэт. Югра мўв нявремата «Ёмаш реп моньщат» киника амша лўңатты ат питл!

Ханты ясаң па литература пата киникайт ханш-

ты ими Евдокия Нёмысова ястас:

» Итэх пурайн ханты литература киника ханш-мемн путар ан тэрмал, щирн ин 10-11 классан пата «Ханты литература» киникая, мосан, В. Кондинан ханшум путрат вўлдум.

Путар ханшас:
Людмила Шульгина



Моньц кәншты икилэ

Мир яңхты эш хонәң кәрт хуща йи икилэ вәс. Лүв щимәщ вер тайс. Хуят лүв хущеда юхәтл: лүв олңәлн иньщәсләллэ, моньщ тайл, муй әнтә. Моньщ тайты хуят холты есәлдәлэ, лапәтләллэ па яньлштәллэ. Щәлта лүв моньщ хәләнтәл. Мәта хә моньщ ән ки тайл, лүв юхи ән есәлдәллэ, щи хәннәхә күш ишкийн ат певда. Ин икилэ хүв муй ван вәс, щиты айлтыева вәтща вәс. Имултыйн йи пирәщ ики юхтәс па лүв хущеда холты ясаң лупәс. Икилэ па юхтум хәннәхәя щиты щи лупл:

» *Моньщ моньштән лампа ки хәла, моньщ ки ән тайлән, елды мәнты әшен пелка елды мәна.*

Пирәщ ики лүвәда щиты юхды лупийл:

» *Моньщ кәпа әнтәм, мулты йис путәрлеңки ищипа айлтыева путәртлум.*

Ин пирәщ ики юхи есәлса, лапәтса па яньлштәтәса. Етная па ил улды пурая йис, икилэ тәмиты щи лупийл:

» *Интәм щи моньщ пурая щи йис.*

Пирәщ ики түт юх тәхты шур пәда вантыйл, па юхды щиты лупл:

» *Илдн вевтам, мәстәл ки, түт юх тәхты шура улдумн, кәрәщ тәхийн моньщ моньщтыя ямшәк.*

Икилэ щиты щи кашәс, хоңтәп пунсәңән па түт юх тәхты шура улды лот версәңән, ил улсәңән. Пирәщ ики моньщты питәс, па моньщ нух сухәнл, па моньщ йилпа олңитл.

Икилэ щитәлн лүвәл, щи хәләнтәл.

Имултыйн пирәщ ики тәмиты лупл:

» *Ләхсем, ма пәлама вантыла!*

Икилэ пирәщ ики пәда вантыйл: «Кай, ешәк хәтдые, пирәщ ики юкана мойпәр ики пида ул!» Щитәлн пакәнмәл сайды хәщ илды пәды ләремәс. Пирәщ ики па щиты лупл:

» *Сәр, ләхсем, аң пакна, нәң пәдана па вантыла!*

Икилэ луваттыйн лүвәл вантыйл: «Сорни нуви, лүв ищи мойпәра ювмәл!» Пирәщ ики елды лүвәда лупл:

» *Я, ләхсем, интәм китумтак мойпәра йисмән, хәнты нә-хә вәлты хотн муй вердумн, вухәлдумн па вәнта шәшумдумн!*

Щиты щи версәлн. Вәнта шәшумсәңән кәт мойпәр ики, ийха щи яңхләңән. Хүв муй ван яңхман ювпийн щи вантләңән, мәттырн вүлең таща етмуман, щәлта вүды таща етмупән, тәрүм лак мүй лак нәхәлсәлн, вәлумкәм, вәлсәлн, сәмлән вохум хәйңән мурта ләсңән па елды шәшумсәңән. Па хүв яңхсәңән муй ван яңхсәңән, вантләңән: ванши хәрийн вән доваң тащ кәл. Йи мәнман интәм дова́т ара нәхәлсәлн па вәлумкәмн вәлсәлн, ищи дов нюхи мурта ләсңән па елды шәшумсәңән. Щиты яңхтән күтн мисы оща етмәсңән. Ощ дыпия еслумсәңән, мисәт пакәнсәт па итәх мислал елды ким навәрсәт, итәх мислал вәлсәлн, вуяң мис нюхи мурта ләсңән па муйн

нүша. Щитәлн па елды шәшумсәңән.

Хүв яңхсәңән муй ван яңхсәңән, щи күтн па нохәр юхәң пәхәра юхәтсәңән. Нохәр юх тыйт пәда вантләңән, нохәр ар енуммәл. Нохрәң юх кәншсәңән па нохәр вүты нух мәнты нумәс версәңән. Пирәщ ики па щиты лүвәда лупл:

» *Ләхсем, нәң айлат хә, сәр сырыя нухды мәна, ма па нәң ювпенән йилдум.*

Икилеңки кашәс щиты па нух мәнты щи питәс, муйкәм мәнл, нохәр илды тәхл, пирәщ ики лүв ювпелн щи йил, Имултыйн икилэ щиты лупийл:

» *Я, тәха, мосәң, илды вухәлдумән, нохәр юхемн иса шеңк ваща щи йис.*

Пирәщ ики па щиты лупл:

» *Әнтәм, па мәна, нә-мәншәк мет ар нохәр щи вәл, аң хәялн!*

Икилэ па мәнл. Имултыйн нохәр юх тыйл илды мендыты питәс. Щи кемн хәрапа щи йис, па ин хә щи лупийл:

» *Я, мосәң, юх тыёмн шәпи щи мәрийл.*

Пирәщ икийн па нух мәнты партла. Икилэ еша па мәнл, юхды пойкшәл, сем йиңкәл нух етләт па щиты лупийл:

» *Щи луват ям вера, илды вухәлдумән, юх тыёмн щи мәремл, ма кәртемн ащәм-аңкәм эвәлт хәщум хорәң тащ тайлум, кәтна ортләдумн. Минемн щит тәрмәл, әңхи нохәрн муй вердумн?*

Пирәщ ики лупл:

» *Ей, ләхсем, нәң хорәң ташен, вояң ташен па довлән-мислән хүвн пәр-сәт. Еслумтайды! Антәм ки, аң щи похәлмәдем.*

Икилэ нәмәсл:

» *Я, лүв кашл, ищипа сурум щи, еслумдум.*

Щи еслумтәс. И дыпи тум тәхәлн йи кәлән-лантән, лүвәл нюл әнтәм, сем әнтәм. Хәләнтийл, илампә дыләң. Пирәщ ики щи няхәл, щи няхәл. Икилэ семңәл кәлы күт эвәлт нухшәк пүншсәлэ па вантәл. Мәттырн, немүлт мойпәра әнт ювман. Лүв хот хәрәлн ул, веншлал иса шүкатмәл. Щи эвәлт түт юх тәхты шур эвәлт илды пәды еслуммәл. Пирәщ ики па лүвәда щи лупл:

» *Интәм па ким щи етлумн.*

Ким етсәңән, кәрт мухәла яңхсәңән, мәттырн, яна вүлең тащл па довләл, мисләл иса әнтәма ювмәл. Ин Икилэ тәп холдман әл омсыйл. Щи киньща пирәщ ики па лүвәда лупл:

» *Я, щи, ләхсем, моньщ ки кәншсән, моньщен щимәщ щи! Па тәлта елды вәлтәнән ешл потум хә – ешл хошмәлта, күрл потум хә – күрл хошмәлта, моньщ тайты хә – моньщ ат моньщәл, моньщ ән тайты хә – әл ул путәртәл. Мойң хуят пәта хот овен ертән аң ертла, доньщән аң питла!*

«Ленин пәнт хүват»,
№ 50 (1262) газета,
ван хәтлуп тыләщ
10-мит хәтл, 1971-мит олн
П. Аликов моньщ
Владимир Енов
йилпа ләщәтәс



Ёмӑңхӑтл ӑмща мӑнӑс



Мирхота юхтум юх ӑхтын хӑншты вӑндтӑйдлӑт



Нявремӑт пӑта юнтты хӑр верӑнтсы. О. Боровкова китум хурӑн

Нижневартовской район Варьӑган кӑртӑн Ас потты тылӑщ 4-мит хӑтлӑн «Искусств-вайт ат» немпи Россия мӑвтел, мир акция верӑнтсы. Щит «Этнографический парк-музей с. Варьӑган» хотн рӑпитты ӑх лӑщӑтсӑт. Хутыса щи хӑтл мӑнӑс, мӑнема щи тӑхи кӑща не Олеся Геннадьевна Боровкова путӑртӑс.

Щи хӑтлӑн 12 щосн музей хот овӑл пӑншсы. Етн вӑнты юхтум мойӑ ӑх щӑта шавиты йис пурмӑсӑт шивӑлӑты па кашӑн пурмӑс олӑнӑн уша павӑтты щир тӑйсӑт. Етн пелка мойӑ ӑх ийха ӑкӑтсыйт. Музей кӑща не О.Г. Боровкова лывела ӑмӑңхӑтл пида ям вӑща ясӑт лупӑс.

Щи юпийн лӑв ол мӑр лывела нӑтты хуятӑта ишӑк непекӑт катлуптӑс, щит Вера Осевна Айваседа, Елизавета Даниловна Василькова, Антонина Ефимовна Сардакова, Аграфена Валюмовна Белоусова, Геннадий Осевич Иуси, Ульяна Филипповна Иуси.

Щӑлта мойӑ хуятӑт

музей хот питрӑтн ихтум па пӑсанӑтн омсум йис пурмӑсӑт олӑнӑн уша версӑт. Камн омсум хӑнты хотӑт, лупасӑт па па омӑсты утӑт ищи вантты щир вӑс. Щӑта рӑпитты ӑх кашӑн пурмӑс олӑнӑн тӑса путӑртсӑт.

Щи юпийн мойӑ хуятӑт Юрий Вӑлла немпи музей-хота вохӑнтсыйт, лыв уша павӑтсӑт, хутыса щи тӑхи пӑншсы, муйсӑр пурмӑсӑт щӑта шавиман тӑйлдыйт.

Щи пурайн нявремӑт пӑта музейн лӑн хотн юнтты хӑр верӑнтсы. Щӑта лыв еплӑн хӑнты лӑтутӑтн лапӑтлдыйт па турнӑн шайн яньщлӑтсыйт.

» Щи юпийн этнографической хотӑвн мойӑ хуятӑт

пӑта вӑндтӑты хӑрӑн пӑншсӑв. Тӑта рӑпитты не Анастасия Евгеньевна Контерова хӑннӑхӑ лавӑлты щира ай ут верты вӑндлӑс, щӑта нявремӑт па вош эвӑлт юхтум ӑх вӑндлӑтсыйт. Щи тумпи мӑн Новооганск вош эвӑлт Мирхота Ия Григорьевна Хабибулина вохӑнтсӑв. Лӑв тӑта мойӑ ӑх юх ӑхтын хӑншты вӑндлӑс. Щив Варьӑган кӑртӑвн вӑлты тӑса ӑнтӑсты неӑт юхӑтсӑт. Лывела шеӑк ӑмӑщ вӑс йиллуп вер уша павӑтты. Еллы ӑмӑңхӑтлӑт пурайн мӑн па щи тыв тӑса верӑнтты хуятӑт вохты пиллӑв, лӑдн кӑртӑн мирев па йиллуп верӑт олӑнӑн уша ат павӑтлӑт, – лупӑс Олеся Геннадьевна.

Щи вӑндтӑты хӑр

юпийн иса мойӑ ӑх пӑса-на вохӑнтлдыйт. Щӑта дыв сорт эвӑлт каврум хошум ийӑнӑн лапӑтсыйт, еплӑн хӑлӑн па воньшумутӑн нянят пида анши шай яньщӑт.

Лӑвман-яньщман мойӑ ӑх «Знатоки-этнографы» юнтпсыйн юнтсӑт па щи юпийн «Красный лёд. Сага о ханты» кина вантсӑт, щит Еремей Айпинӑн хӑншум «Божья мать в кровавых снегах» немпи киника хӑват лӑщӑтсы.

Мосл лупты, щи хӑтлӑн музей хота 87 хӑннӑхӑ юхтӑс, щит Новооганск, Радужный па Варьӑган вошӑтн вӑлты ӑх.

Путӑр хӑншӑс:

Надежда Рагимова

Ханты ясанг
(Хантыйское слово)
№22 (3634), 23.11.2023

Соучредители
Дума, Правительство
Ханты-Мансийского
автономного округа – Югры

Издатель
Департамент внутренней
политики
ХМАО-Югры

Редакция

Директор, главный редактор –
Динисламова С.С.
Телефон (3467) 33-36-82

Заместитель главного
редактора – Рагимова Н.В.
Телефон (3467) 33-24-02

Ответственный секретарь –
Вах Н.И.
Телефон (3467) 33-24-02

Адрес редакции и издателя:

628011, г. Ханты-Мансийск,
ул. Комсомольская, 31
тел./факс (3467) 33-17-52

E-mail: gazeta@khanty-yasang.ru
Газета размещена на сайте
www.khanty-yasang.ru

Отпечатано:

ООО «Новости Югры-
Производство» г. Сургут,
ул. Маяковского, 14.

Индексы 04393, 54393

Тираж 2166 экз.

Заказ 5583

Цена свободная

Газета
зарегистрирована
Управлением Федеральной
службы по надзору в
сфере связи,
информационных технологий
и массовых коммуникаций по

Тюменской области,
ХМАО-Югре и ЯНАО.

12+

Свидетельство о регистрации
ПИ №ТУ 72-00796
от 23 января 2013 г.

Мнение авторов публикаций
не обязательно отражает
точку зрения редакции.